

REGLUGERÐ

**um ráðstöfun á sérstöku fódurgjaldi, sem innheimt er vegna afurða
nautgripa, sbr. reglugerð nr. 259/1985 skv. lögum nr. 46/1985
27. júní 1985, um framleiðslu, verðlagningu og sölu á búvörum.**

1. gr.

Endurgreiða skal framleiðendum nautgripaafurða hluta sérstaks fódurgjalds, sem lagt er á innflutt fóður, við tollafgreiðslu sbr. reglugerð nr. 259 frá 1. júlí 1985. Endurgreiðslan skal vera $\frac{75}{80}$ hlutar af álögðu sérstöku fódurgjaldi, sbr. 6. gr. Af sérstöku fódurgjaldi renna sem næst $\frac{5}{80}$ hlutar til Framleiðnisjóðs landbúnaðarins, að frádegnum kostnaði Framleiðsluráðs landbúnaðarins við framkvæmd endurgreiðslanna, sem landbúnaðarráðherra samþykkir.

Framleiðsluráð landbúnaðarins skal annast endurgreiðslu til framleiðenda í samræmi við ákvæði þessarar reglugerðar.

2. gr.

Endurgreiðsla á sérstöku fódurgjaldi fer fram af endurgreiðslureikningi til framleiðenda sbr. 5. gr., annaðhvort með milligöngu fódursala eða beint af endurgreiðslureikningi. Sami aðili getur ekki látið fódursala annast um hluta endurgreiðslanna og annast hinn hlutann sjálfur, heldur verður hann að velja aðra hvora leiðina.

3. gr.

Hinu sérstaka gjaldi skal haldið á sérgreindum reikningi, er Framleiðsluráð færir — endurgreiðslureikningi — sem Ríkisendurskoðun annast endurskoðun á. Ríkisféhirðir gerir skil mánaðarlega til Framleiðsluráðs, til færslu á endurgreiðslureikning, á hinu sérstaka fódurgjaldi samkv. reglugerð nr. 259/1985, hvort sem er í formi sjálfskuldarábyrgðar eða peninga. Framleiðsluráð gerir á sama hátt skil mánaðarlega til Framleiðnisjóðs á þeim hluta hins sérstaka fódurgjalds, er greiða ber í sjóðinn, sbr. 1. gr., og gjaldfallið er, sé um sjálfskuldarábyrgð að ræða.

4. gr.

Nú velur framleiðandi, sem á rétt á endurgreiðslu á sérstöku fódurgjaldi, þá leið, að fódursali annist endurgreiðsluna og gefur hann þá viðkomandi fódursala (fódurseljendum) umboð til þess fyrir sína hönd. Aður en Framleiðsluráð gengur frá endurgreiðslu til fódursalans, skal umboð hans til að annast endurgreiðslur fyrir hönd hvers framleiðanda liggja fyrir. Umboðið gildir svo lengi sem það er ekki afturkallað.

5. gr.

Endurgreiðsla hins sérstaka fódurgjalds skal miðuð við framleiðslumagn. Endurgreiðsla vegna framleiðslu á mjólk fer fram mánaðarlega eftir skýrslum um innvegna mjólk til mjólkurbúa og á sama hátt til þeirra, er selja mjólk beint til neytenda. Skýrslur um beina sölu mjólkur skulu staðfestar af oddvitum eða hreppstjórum. Kjarnfódurgjald til framleiðenda á nautgripakjöti skal endurgreiða eftir skýrslum sláturleyfishafa um framleiðslu á nautgripakjöti er séu staðfestar af kjötmatsmanni.

6. gr.

Endurgreiðsla á fóðurgjaldi til framleiðenda á afurðum nautgripa verði framkvæmd þannig, að Framleiðsluráð landbúnaðarins reiknar fyrir hvern mánuð hverju hið sérstaka fóðurgjald nemur að meðaltali í verði kjaranfóðurs, annars vegar sem fer til mjólkurframleiðslu og hins vegar sem fer til framleiðslu á nautgripakjöti. Hinn endurgreiðanlega hluta skal síðan miða við, að til framleiðslu á einum lítra mjólkur fari 180 grömm kjaranfóðurs og á einu kílógrammi nautgripakjöts 850 grömm af kjaranfóðri. Sérstakt fóðurgjald endurgreiðist ekki af framleiðslu kýrkjöts og ungkálfakjöts.

Endurgreiða skal framleiðendum mjólkur hið sérstaka fóðurgjald þannig, að mánuðina september, apríl og maí greiðist það gjald sem fundið er samkvæmt 6., 7. og 8. gr. með 25% álagi og mánuðina október, nóvember, desember, janúar, febrúar og mars greiðist það með 60% álagi. Engin endurgreiðsla vegna mjólkurafurða fari fram fyrir framleiðslu í mánuðunum júní, júlí og ágúst.

7. gr.

Skýrslur afurðastöðva varðandi endurgreiðslu á kjaranfóðurgjaldi til framleiðenda mjólkur og nautgripakjöts skulu bera með sér nafn, nafnnúmer og heimilisfang framleiðanda, tegund og magn afurðar og framleiðslutímabil. Kjaranfóðurgjald endurgreiðist ekki öðrum nautgripaframleiðendum en þeim sem láta löggilta afurðastöð, sbr. l. nr. 46/1985, annast meðferð afurðanna og skýrslugerð. Afurðastöðvum er skylt að gefa Framleiðsluráði landbúnaðarins upplýsingar sem það telur nauðsynlegar til að endurgreiðsla geti farið fram.

8. gr.

Framleiðsluráði er heimilt að endurgreiða framleiðendum nautgripaafurða, umfram það sem útreikningur skv. 6. gr. leiðir til, í eftirfarandi tilvikum:

1. Sé um nýbýlinga að ræða, sem vegna bústofnsauka kaupa fóður umfram það sem er eðlilegt skv. afurðum á tímabilinu.
2. Vegna áfalla í framleiðslu af völdum sjúkdóms eða óhapps, sem leiðir til þess að notkun fóðurs er verulega umfram afurðir.

Framleiðsluráð reiknar endurgreiðslu skv. tölulið 1 og 2 eftir framlögðum gögnum, sem það telur nauðsynleg. Meðal annars skal hverju sinni skylt að leggja fram vottorð forðagæslumanns vegna 1. töluliðar og vottorð dýralæknis vegna 2. töluliðar.

9. gr.

Heimilt er að greiða framleiðendum hluta sérstaks fóðurgjalds með skuldajöfnunarávísunum endurgreiðslureiknings. Framleiðendur mega, við kaup á kjaranfóðri, framselja skuldajöfnunarávísun til fóðurseljanda, sem framvísar henni til endurgreiðslureiknings til greiðslu á fóðurgjaldi, sem greitt hefur verið með skuldaviðurkenningu fóðurinnflytjanda. Óski framleiðandi innlausnar á skuldajöfnunarávísun frá endurgreiðslureikningi, er heimilt af hálfu reikningsins að fresta innlausn í allt að 4 mánuði frá útgáfudegi. Skuldajöfnunarávísuna skal stíla á nafn framleiðanda eða umboðsaðila hans skv. 4. gr.

Reglugerð þessi, sem sett er með heimild í 30. gr. l. nr. 46/1985 um framleiðslu, verðlagningu og sölu á búvörum, staðfestist hér með til þess að öðlast gildi þegar í stað og birtist til eftirbreytni öllum þeim sem hlut eiga að máli.

Landbúnaðarráðuneytið, 8. nóvember 1985.

Jón Helgason.

Guðmundur Sigþórsson.